

四庫全書

子部

欽定四庫全書

子部  
說略卷八

詳校官中書<sub>臣</sub>孫球

主事<sub>臣</sub>祁韻士覆勘

總校官庶吉士<sub>臣</sub>何思鈞

校對官中書<sub>臣</sub>楊世綸

謄錄監生<sub>臣</sub>潘衡

欽定四庫全書

說畧卷八

明 顧起元 撰

史別中

周有八士馬融以為成王時人劉向以為宣王時人他無所考汲冢周書克殷解乃命南宮忽振鹿臺之財乃命南宮伯達史佚遷九鼎三巫疑南宮忽即仲忽南宮伯達即伯達也尚書有南宮括疑即伯适也則八士者南宮氏也以為成王時人近之尚書南宮之姓與汲冢

書南宮之姓合伯達伯适與仲忽之名又合似是無疑  
范鎮碑云膺娑管蘇靖共衛上洪氏謂蓋法家者流也  
范史云律謝臯蘇注以蘇忿生此云管蘇謂夷吾與忿  
生也然又考州輔碑云昔管蘇之尹楚以直見疎劉梁  
傳曰管蘇以憎忤取進此亦用管蘇事考新序楚共王  
有疾告諸大夫曰管蘇犯我以義違我以禮云云用此  
事亦未可知也

漢書薄昭與淮南厲王書曰齊桓殺其弟以反國程子

因據此以子糾為桓公之弟然荀子謂桓公殺兄越絕  
書謂子糾桓公兄也皆與昭不合蓋文帝為厲王兄昭  
特避就以為之諱耳自宋儒以來率謂子糾非所當立  
考之管子載召忽之言曰百歲之後吾君下世有犯吾  
君命而廢吾所立奪吾糾也雖得天下吾不生也況與  
我齊國之政也觀此則糾之立有先君之命矣呂紀曰  
初鮑叔管子召忽三人相善欲相與定齊國以公子糾  
為必立召忽曰吾三人者於齊國猶鼎之有足去一則

不成且小白必不立矣不若三人佐糾也管子曰不可夫國人惡子糾之母以及糾小白無母而國人憐之事未可知不若令一人事小白夫有齊國必此二公子也於是鮑叔傅小白尹文子曰子糾宜立者也小白先入故齊人立之黃楚望曰考春秋立子以貴之義子糾魯出也魯女貴而班在衛上則子糾當立凡此又皆子糾為兄與當立之證也

臯陶之後有嬴氏偃氏以其為理則又有理氏李氏理

天理也故天官書云左角為理然則李理二字古特通用之非有他義也陸佃說理用云李水之子又水子也可謂正矣仁寶也故古以為理官之字管子書云冬李也又云黃帝得后土辨乎北方以為李而呂氏春秋亦云后土為李又云臯陶為李昔晉文公命李離為李以為臯陶之後是矣古者理官之理字直為李其義一也傳云一介行李即昭公十三年傳之行李也蓋在夏商之代已有此李氏矣而姓氏之書及北史若新舊唐書

等乃云老子生於李下而以為姓或云因亂食苦李而得姓或又以為饑餽木子而姓之均為妄誕暨葛孝先直謂老子之母李氏女也故老子因母以為姓迨其孫洪傳諸神仙因謂老子生於李家猶為李姓非也漢屬國侯李翊碑以李氏為出於箕子則尤為無所本矣

左氏不載程嬰公孫杵臼存趙事而史記言之頗詳左氏稱趙武從姬氏畜於公宮以其田與祈奚韓厥言於晉侯曰成季之勲宣孟之忠而無後為善者懼矣乃立



武而反其田是無嬰與杵臼之事也史記則言晉滅趙之族朔妻成公姊有遺腹匿公宮生武公孫杵臼程嬰以死存之越十五年因韓厥得復田邑二說似乎不一蓋左氏為文高簡且其所載以立武復田為重故詳叙其後而不暇悉其初然謂趙武從姬氏畜於公宮則所謂朔妻匿於公宮與武之生及二子之存孤可一語盡之矣史記追叙本末故詳著焉二說固可會而一也趙之族滅左氏謂趙嬰齊遁於莊姬原屏放之於齊莊姬

以是怨原屏譖而殺之而趙氏滅史記則謂大夫屠岸賈討靈公之賊殺朔與嬰齊同括而趙氏滅二說不同合二書考之蓋趙朔趙同趙括之死本各因一事各為一時史記得之傳聞誤合為一遂致事詞參錯不可稽耳今按趙同於朔死之後見於左氏春秋者不一而足其非同時被殺甚明且趙世家載晉景公三年屠岸賈攻趙氏於下宮殺趙朔趙同趙括趙嬰齊皆滅其族晉世家則載景公十二年以趙括與韓厥等五人為卿已

自相抵牾不足信矣

史記載孫叔敖優孟事甚詳按叔敖浮光期思縣人也  
期思今廢為鎮費補之云予得漢延熹中碑書是事微  
有不同云病甚臨卒令其子曰優孟曾許千金貸吾孟  
楚之樂長與相君相善雖言千金寶不負也卒後數年  
莊王置酒以為樂優孟乃言孫君相楚之功即忼慨高  
歌涕泣數行王心感動覺悟問孟孟具列對即求其子  
而加封焉子辭父有命如楚不忘亡臣社稷功而欲有

賞必於潘國下濕境埴人所不貪遂封潘鄉潘即固始也而所載歌絕奇曰貪吏而不可為而可為廉吏而可為而不可為貪吏而不可為者當時有汙名而可為者子孫以家成廉吏而可為者當時有清名而不可為者子孫困窮被褐而賣薪貪吏常苦富廉吏常苦貧獨不見楚相孫叔敖廉潔不受錢味其語憤世嫉邪含悲哀怨過於慟哭比之史記所書遠勝聽者安得不感動也歐陽公集古錄謂微斯碑後世遂不復知叔敖名饒又

謂碑亦罕傳余以集錄二十餘年間求之博且勤乃得之云

孔子以魯襄公二十二年庚戌十一月庚子生羅泌以  
為八月二十七日五行書論孔子以庚戌年二月二十  
三日庚子甲申時生明崔銑松憲寤言謂孔子己酉冬  
十月二十一日庚子生夏八月也六歲而顏路生九歲  
而子路生十五歲而閔子騫生十九而娶丹官氏亦非  
三十而婚之禮也二十而生伯魚時為季氏司職吏史

記言弟子益進此時諸門人皆未生不知果何弟子也  
二十九歲冉有仲弓生三十巫馬期生三十一顏淵生  
伯魚年十一矣三十二子貢生三十五樊遲生次年原  
憲生本傳云夫子自周反魯弟子稍益進顏子方六歲  
不知又何人也又云魯亂適齊為高昭子家臣以通乎  
景公夫孔子三十歲時景公與晏嬰適魯既有秦穆公  
之對而景公說矣至此又何必自辱為家臣以通乎景  
公也不臣於晏嬰而臣於高昭子何也三十九澹臺滅

明生四十二公西華生四十五卜子夏生陽虎亂季氏  
僭夫子不仕退而修詩書禮樂弟子彌衆至自遠方莫  
不受業時顏子方十五次年而子游曾子方生乃問欬  
器夫十七而孟釐子稱其達三十三而齊景公稱其聖  
人之智四十二而知桓子之獫羊辨吳專車之骨反獨  
不知宥坐之器而問焉何也本傳四十七為中都宰史  
記在五十一年次年子張生又次年子賤生五十一誅  
少正卯史記遲五年五十七畏于匡顏淵後年二十七

子路年四十八而由之本傳在五十四困陳蔡之後亦誤也自陳遷蔡史記作六十傳多三年危陳蔡之時弟子有愠心子路時五十四子貢三十二顏子三十三則伯魚當四十四傳云鯉五十而卒則顏子亦當四十三四矣以請車之事知之何以曰三十二而卒也夢奠時傳作七十三吳氏曰時伯魚已歿六年則又當為七十五矣崔銑以為哀公十六年夏四月十八日己丑卒夏二月也生從穀梁卒從左氏年七十四此皆人物考之



失考者也

子見南子說者皆引史記以謂孔子見衛靈公寵姬南子孫奕云攷家語孔子適衛子驕為僕衛靈公與夫人南子同車出而令宦者雍渠驂乘使孔子為次乘遊過市孔子恥之夫孔子方以季桓子受齊女樂而去魯適衛至衛又肯為靈公南子次乘哉且六經以至魯論家語皆無見衛南子之事南子當為魯之南蒯耳何以知之以佛肸召子欲往而知之佛肸以中年畔子路亦不

悅其見蓋昭公十四年南蒯之奔齊也侍飲於景公公曰叛夫對曰臣欲張公室也南蒯欲弱季氏而強魯此夫子所以見之也與佛肸不約而同故知其非見衛之南子而見魯之南子昭昭矣

論語公山不狃以費叛召孔子史記在定公九年孔子為中都宰前春秋不書者以費叛季氏非叛魯也十二年季孫斯仲孫何忌從孔子墮費時豈有費叛如家語所云是時孔子既尊用於定公尤見信於季氏三家聽

其行事如此乃欲舍魯背季而赴費人之召豈人情哉  
不徇召孔子事無之則已若有之則史記九年為得其  
實而家語所云與左傳所載非矣

孔子列逸民之行而不及朱張朱子謂朱張不見於經  
傳今按困學紀聞有云朱張行與孔子同故不復論也  
其謂行同於孔子蓋本王弼之註曰朱張字子弓荀卿  
以此孔子釋文亦引之

論語申張鄭玄云即申續史記申棠字周家語申續字

周史記以棠為黨家語以棠為續傳寫之譌也後漢王政碑有羔羊之潔無申棖之欲亦以棖為棠則申棖申棠一人爾開元封申黨召陵伯又封申棖魯伯宋祥符封棖文登侯又封黨淄川侯並列從祀失於詳攷論語釋文也

魏文侯以卜子夏為師按史記所書子夏少孔子四十歲孔子卒時子夏年二十八矣後一年元王立歷貞定王考王至威烈王二十三年魏始為侯去孔子卒時

七十五年文侯為大夫二十二年而為侯又十六年而卒姑以始封之歲計之則子夏已百三歲矣方始為諸侯師豈其然乎此出宋永亨搜采異聞錄其辨攷甚確余謂子夏退而老於西河之上弟子從者甚衆文侯或少時或為大夫時師之後人舉其事追叙之因稱魏文侯耳

按春秋左氏周以子正而晉獨用夏正故絳老曰臣生之歲正月甲子朔四百四十五甲子矣師曠謂是叔仲

惠伯會承匡之歲於今七十三年今起文公之十一年  
正月上盡是年二月癸未為七十有四年於曠說不合  
長歷攷之則文之十一年正月一日為乙丑所稱甲子  
乃三月朔是年二月二十三却為七十三年以傳言之  
則自此以前晉國已用夏正僖公四年十二月申生縊  
經書五年春九年十一月殺卓子經書十年正月十年  
冬晉殺丕鄭經書十一年春蓋傳或據晉史而經則周  
歷也左氏既與經違而杜每以為從赴夫以赴辭必舉

日月始豈得而更哉國語僖十六年文公過五鹿子犯  
曰十有二年歲在鶉火必獲此土以十二年則為二十  
七年是歲歲在鶉尾而取五鹿乃在二十八年之正月  
以夏正數則在二十七年之十一月始應鶉尾之說獻  
公之伐虢卜偃曰克之其九十月之交乎十二月丙子  
朔晉滅虢是以周十二月為十月也據汲冢紀年書特  
紀一晉起自殤叔至莊伯十一年魯隱之元年也皆以  
建寅首迨晉滅乃復收紀魏事故預以為魏國之史預

蓋知此故於正月每云謂夏正月又云正天時以夏正而已劉知幾不之知乃以為春秋諸國皆用夏正魯以天子禮樂獨用周正斯又大妄左氏所記周夏之時不一而足魯隱之元則斷以為周月獨有合於經指故表而出之

范曄傳曄入秦變姓名為張祿學者蓋不知秦先時自有張祿也初孟嘗君柄齊悅張祿先生之教奉之黃金百斤文織百純祿辭而不受他日謂孟嘗君曰夫秦西



塞國也遊宦者不得入焉願君為吾為丈尺之書寄我  
於秦王我往而遇乎固君之人也往而不遇乎雖人求  
間謀固不遇矣孟嘗君曰敬聞命因為之書寄之秦王  
往而大遇考之田文之卒在范雎未入秦之先則張祿  
之入秦居范雎之前久矣雎入秦而踵名張祿豈祿嘗  
有聞於諸侯秦特令雎冒其名以誑鄰國邪

史記載孟子受業子思之門人不察者遂以為親受業  
於子思非也攷之孔子二十生伯魚伯魚先孔子五年

卒孔子之卒敬王四十一年子思實為喪主四方來觀禮焉子思生年雖不可知然孔子之卒子思則既長矣孟子以顯王二十三年至魏赧王元年去齊其書論儀秦當是五年後事距孔子卒百七十餘年孟子即已耆艾何得及子思之門相為授受哉孔叢子稱孟子師子思論牧民之道蓋依放之言也

漢高祖荀悅曰諱邦字季蕭何曰劉季固多大言呂媼曰何自妄許與劉季呂后曰季所居上常有雲氣故從

往常得季夫季當為行如古之伯仲季非字也如後曰  
追尊兄伯號曰武哀侯伯名演字伯升又曰始大人常  
以臣亡賴不能治產業不如仲力今某之業所就孰與  
仲多仲邵陽侯名喜能為產業見漢書是知伯仲非二  
兄之字皆行也古人質朴故以伯仲季為字稱耳如云  
會羽季父左尹項伯師古曰伯者其字也名纏後賜姓  
劉封射陽侯見功臣表吳王濞父字為仲又曰邦之字  
曰國者蓋臣下以國避諱代邦之義也如惠帝諱盈之

字曰滿師古曰臣下以滿字代盈是也

會稽太守王景興問士於虞翻翻對曰鄆大里黃公潔  
已暴秦之世會稽續志云黃公之賢列於四皓晉夏統  
言會稽土地風俗其人循循然猶有黃公之高節杜子  
美詩云黃綺終辭漢王逸少有尚想黃綺帖陶淵明詩  
云黃綺之商山南史阮孝緒云漢道方盛黃綺無間山  
林是皆以黃為姓矣王貢傳序四皓名字當讀為綺里  
季夏而後人誤讀為夏黃公者亦猶樂正裘牧仲之誤

耳然攷之宋世商於人有得四皓神坐者乃西漢所書  
鑿石為位以為祭也一曰園公神坐一曰綺里季神坐  
一曰夏黃公神坐一曰角里先生神坐昔王元之在汝  
水以詩寄畢文簡曰未必頸如樗里子定為頭似夏黃  
公文簡謂綺里季夏當為一人黃公其別一人也元之  
檢諸書得陶淵明洎唐詩皆言黃綺如李白輩亦如此  
即改此詩自是人皆以文簡為据得四皓神坐知元之  
非誤但昔人論四皓或言園綺或言綺夏不必盡舉首

字取文順則用之或淵明自讀作綺里季夏不可知也  
周燮曰追綺季之跡世說曰綺季東園公夏黃公角里  
先生謂之四皓姓書有綺里先生季其字也夏黃公無  
可疑者園一曰圜風俗通楚鬻熊之後為圜考之陳留  
志圜公自是秦博士周庾字宣明襄邑人以常居圜中  
故謂圜公或曰姓圜名秉昔圜稱換陳留風俗記蔡邕  
集有圜典魏有圜文生皆其後也古者角與祿同文故  
樂書作祿鄭康成於禮角皆作祿陳留志作角唐李潛

嘗辯之路史又云夏里黃公姓崔名廓字少通齊人隱  
居夏里角里先生則係秦伯之後姓周名術字元道京  
師謂之霸上先生角里亦其號耳神坐路史作神胙杌  
引三輔舊事云漢惠帝為四皓作碑於隱所則知神胙  
杌俱當時所刻者

夫子云丈夫子也漢嚴忌字夫子非也當由鄒陽傳誤  
本云枚先生嚴夫子皆不敢諫師古云先生枚乘夫子  
嚴忌而以夫子為嚴之字則先生亦當為枚之字耶乘

自字叔也忌無考

漢書載張騫窮河源言其奉使之遠實無天河之說唯博物志云客星犯牛斗事後人云得織女支機石以問君平皆子虛烏有之談耳寶厯中京洛遞夫昇張騫槎不知何物前輩詩往往用張騫槎杜子美亦云奉使虛隨八月查相襲繆誤如此

東坡二疏贊云孝宣中興以法馭人殺蓋韓楊蓋三良臣先生憐之振袂脫屣使知區區不足驕士其立意亦



超卓矣然攷之二疏去位在元康三年後二年蓋寬饒  
誅又三年韓延壽誅又三年楊惲誅方二疏去時三人  
尚無恙也

阮嗣宗詩西遊咸陽中趙李相經過註謂李夫人趙飛  
燕大誤或云趙飛燕李平皆成帝所幸婕妤然不應與  
婕妤遊從班史谷永傳又有為趙李報德復怨註小臣  
趙李從微賤尊寵楊用修又言即趙季李疑二人皆陽  
翟大俠為何並所殺未審孰是也

傳稱揚雄有大度自守泊如仕成帝哀平間末言仕莽作符命投閣年七十一天鳳五年卒攷雄至京見成帝年四十餘矣自成帝建始改元至天鳳五年計五十有二歲以五十二合四十餘已近百年則與所謂年七十一者又相抵牾矣又考雄至京大司馬王音竒其文而音薨永始初年則雄來必在永始之前無疑然則謂雄為延於莽年者妄也其云媚莽妄可知矣此泰和胡正甫所辯也以子雲有美厥靈根語為伊川所取信其決

非媚莽者此自賢者微顯闡幽之意抑子雲又言大明  
煌煌旁燭無疆遜於不虞以保天常豈浮湛亂世危行  
孫言別有指邪然以余攷之正甫言自成帝建始改元  
至天鳳五年計五十有二歲以五十二合雄初至京年  
四十餘已近百年謂傳所云七十一歲者相牴牾是謂  
雄至京師在成帝即位之始也今以漢書漢紀子雲文  
集反覆參校成帝元延二年行幸甘泉河東至王莽建  
國二年符命事發雄投閣之歲計二十年王音薨於永

始二年正月至建國二年計二十四年至天鳳五年計三十五年傳言雄年七十一以是年卒逆推而上至奏甘泉賦時雄年四十一矣王音前是陽朔三年九月以王鳳薦為大司馬傳云雄至京師音奇其文則雄之至京師在陽朔歷鴻嘉至永始二年之八年中是時雄年尚未四十也成帝以即位初年作長安南北郊罷甘泉汾陰祀至永始三年皇太后詔有司復甘泉泰畤汾陰后土雍五畤陳倉陳寶祠是時趙飛燕姊妹方大幸四

年正月行幸甘泉元延二年正月幸甘泉郊泰時三月  
行幸河東祠后土冬行幸長楊宮從胡客大校獵明年  
上將大誇胡人以多禽獸命右扶風等載輸長楊射熊  
館雄時從行此雄上河東甘泉羽獵長楊四賦之繇也  
成帝即位初改元建始時雄年二十歲未必是年即至  
京師也哀帝元壽二年春單于將來朝公卿議勿許雄  
為黃門郎上書諫帝召匈奴使而許之賜雄帛五十疋  
黃金十斤解嘲作於哀帝時傳所稱三世不遷官蓋合

成哀平三世而言之耳今若以獻賦時雄年四十一以是年至京師至天鳳五年卒正與傳七十一而卒之數合而又與傳所言雄年四十餘自蜀來游至京師大司馬車騎將軍王音奇其文雅召以為門下史薦雄待詔歲餘奏羽獵賦者不合矣蓋以天鳳五年上至音卒之年雄年當三十有七非四十餘其不合一也若音在日雄至京薦為待詔至奏賦時已五六年音死亦五年矣不應言音薦雄待詔歲餘奏賦也其不合二也既云雄

至京四十餘王音薦之則自永始二年音在日至天鳳五年凡三十五年以雄年四十餘合三十五年當得年七十五六歲矣不應言七十一而卒果七十一而卒則卒宜在天鳳元年之一年前以建國八年而卒矣不應言天鳳五年其不合三也蓋正甫所以攻漢書者言辯而未盡事理而本傳實自相牴牾難以為據正甫又引郾縣志簡公紹芳援桓譚新論曰雄作甘泉賦一首夢腸出而內之明日遂卒且曰祠甘泉在永始四年按祠

甘泉在元延二年紀傳載之甚明雄先奏甘泉賦後奏河東賦後又奏羽獵賦後又奏長楊賦哀帝中又上諫不受單于朝書此云賦甘泉明日而卒者果可為的据邪簡公以班孟堅蚤世曹大家傳失其實而必執以子雲死在成帝永始四年正甫又以為子雲來京師在建始初死當在平帝末年如此則以七十一歲而卒之逆推至成帝即位初雄年方三十五亦未得為四十餘也傳與二公之言校之多有不合簡又以劇秦美新或出



於谷子雲按漢書谷永元帝建昭中舉為太常丞成帝  
建始三年日蝕地震為陽城侯劉慶忌舉待詔公車對  
策至王莽篡位時已四十五年矣年七十者自可延  
至此時乃按百官表永以成帝元延四年由北地太守  
為大司農一年免本傳言永病三月有司奏請免故事  
公卿病輒賜告至永獨即時免數月卒於家谷子雲之  
死明白如此且其死去莽篡位時十有七年千載而下  
乃以美新事懸坐之恐九泉有知亦不肯甘受也余說

略中截取正甫之言因為備考諸書之同異如此

後漢二十八將名次不可曉第一人鄧禹顯者也第二人馬成無聞焉第三人吳漢顯者也第四人王梁無聞第五人賈復顯者也第六人陳俊無聞第七人耿弇顯者也第八人杜茂無聞首尾皆然立功次序不應相間雜如此薛伯宣常州云舊本漢書作兩重排列上一重鄧禹居首次吳漢次賈復次耿弇下一重馬成次王梁次陳俊次杜茂後人重刊遂錯悞此極有理范曄論云

此外又有王常李通竇融卓茂合三十二人今本乃以王常臧宮李通馬武竇融卓茂為序則將上下重誤合而為一明矣按王應麟玉海紺珠集載二十八將首鄧禹次吳漢又次賈復馬成乃第十六王梁第十七陳俊第十八杜茂第十九則知漢書本文自明特刊書之誤耳

漢書註有曰臣瓚者不知為何人晉中書監魯和嶠嘗領命校正穆天子傳五卷瓚乃其校書官屬郎中傳瓚

也後人取其說以釋漢書故有臣瓚註語按漢書余靖刊誤已知有傳瓚然亦疑其未足据矣余攷酈道元經注多引薛瓚漢書注則臣瓚者安知其非薛耶道元後魏人去晉不遠其書引用不一而足當不誤也宋景文云劉孝標類苑以為于瓚水經注以為薛瓚而終云不足取信似未深攷也

晉書云初玄石圖有牛繼馬後故宣帝深忌牛氏遂為二楹共一口以貯酒帝先飲其佳者而以毒酒醵其將

牛金而恭王妃夏侯氏竟通小吏牛氏而生元帝今通鑑省其文云通小吏牛金而生元帝牛金可謂枉著一死又負穢名殊可笑也又按唐元行沖元魏之後著魏典三十卷引魏明帝時西柳谷瑞石有牛繼馬後之像舊史元帝本出牛氏誣辭也按魏道武帝父名什翼犍或其繼之之像而楊慎云魏道武名犍亦可笑道武始名涉圭後名珪故不名犍也

唐人云君苗無姓呂安無字此言何謂也按文選注呂

安字仲悌又應瑒有與從弟君苗書則唐人所云者止謂史失其傳耳亦訓人不可不通文選也

五臣注文選謂陶淵明詩自晉義熙以後皆題甲子後世因仍其說獨治平中虎丘僧思悅編淵明詩辨其不然其說曰淵明之詩題甲子者始庚子迄丙辰凡十七年皆晉安帝時所作至恭帝元熙二年庚申歲宋始受禪自庚子至庚申蓋二十年豈有宋未受禪前二十年恥事二姓而題甲子之理曾裘父艇齋詩話亦信其說

然以余攷之元興二年桓玄篡位晉氏不斷如綫得劉裕而始平改元義熙自此天下大權悉歸劉裕淵明賦歸去來辭實義熙元年也至十四年劉公為相國恭帝即位改元元熙至二年庚申禪於宋觀恭帝之言曰桓玄之時晉氏已亡天下重為劉公所延將二十載今日之事本所甘心詳味此言則劉氏自庚子得政至庚申革命凡二十年淵明自庚子以後題甲子者蓋逆知其末流必至於此忠之至義之盡也

大隱金門者東方朔也見史記又人隱者東方朔也天  
隱者仲長子光也見文中子通隱者何點也見本傳充  
隱者皇甫希之也見桓玄傳朝隱者王僧佑也見南史  
黃扉隱士者許寂也仕蜀好修鍊見蜀檮杌假隱者盧  
藏用也舉進士不調始隱終南有意當世見談賓錄游  
俠隱士者前何點與弟屑也遨遊人間俱見本傳蜘蛛  
隱者龔舍也見飛蟲觸蜘蛛網而死因掛冠而退時人  
謂蜘蛛隱見金樓子



淮陽一老漢應曜也隱於淮陽山中與四皓俱徵曜獨  
不至時人謂之曰商山四皓不如淮陽一老見白帖隱  
侯漢王立奕也景帝徵不至遂就山而封侯因以為名  
見盧元明緱山記所居士漢摯峻也與司馬遷交好隱  
於所山卒所人立祠號曰所居士見高士傳立德先生  
漢法真也順帝四徵不屈友人刊石頌之見高士傳有  
道大夫漢李恢也桓靈間不仕見北史李士謙傳竹中  
高士晉張廌也家有苦竹數十頃在竹中為屋王右軍

造之不與相見一郡號為竹中高士見永嘉郡志被褐先生東莞臧縈緒自號也見南齊書物外司馬王晞也王事鞅掌雅志不移人士號之見北齊書逍遙公韋叟也明帝遺以詩答詩願不時朝謁帝勅有司日給河東酒一斗號之曰逍遙公見周書東臯子王勣也游北山東臯著書見南史梁丘子唐白履中也開元中人見唐世說烟波釣徒張志和也見一品集江湖散人又天隨子甫里先生皆陸龜蒙自號也見唐書遺名子韋渠牟

隱鍾山自號見金陵志荆臺隱士梁震也唐末進士後  
不仕高從誨見五代史

至道九老太子中允張好問年八十五太常少卿李運  
年八十故相吏部尚書宋琪廬州節度副使武允成皆  
七十九賜紫吳僧贊寧年七十八郢州刺史魏丕年七  
十六左諫議大夫楊徽之年七十五故相司空李昉水  
部郎中朱昂皆七十一然以蜀寇作不及宴其明年昉  
卒遽罷若洛社耆英則前懷州司馬胡杲年八十九衛

尉卿致仕吉皎年八十六前右龍武軍長史鄭據年八十四前益州刺史劉真年八十二前侍御史內供奉官盧真年七十八前永州刺史張渾刑部尚書白居易俱年七十而秘書監狄並謬河南尹盧貞以未七十雖與會而不及列洪景盧謂此會有兩盧真蓋誤以真為貞也後洛社耆英則開府儀同三司守司徒武寧軍節度使致仕韓國公富弼年七十九河東節度使開府儀同三司守太尉判河南府兼西京留守司事潞國公文彥

博司封郎中席汝言俱年七十七太常少卿致仕王尚恭七十六太常少卿致仕趙丙秘書監致仕劉儿衛州防禦使致仕馮行已年七十五太中大夫天章閣待制提舉崇福宮楚建中年七十三司農少卿致仕王謹言年七十二太中大夫提舉崇福宮張問龍圖閣直學士通議大夫提舉崇福宮張燾俱年七十端明殿學士兼翰林學士太中大夫提舉崇福宮司馬光六十四援盧狄例在會而不預圖檢校太尉宣徽南院使判大名府

王拱辰年七十一時出鎮預列而不在會前社多高壽而後社名位重樂天又有宴致仕裴賓客九十餘王尚書八十餘白為太子少傅劉夢得為太子賓客俱七十三路公又與中散大夫程暘朝議大夫司馬旦司封郎中席汝言作同甲會在洛社之次年元豐十老燕集序米芾作章帖守杭與郡之長老游從各飲酒賦詩見其人為內閣清河公正議大夫廣平公太中大夫濮陽公朝議大夫清豐公朝議大夫彭城公朝議大夫徐公朝

散大夫鄭公承議郎崇君奉議郎黃君不著年歲而序  
言貌若遼鶴言為龜鑑則亦皆高年矣又杭州在正統  
間大理正郎子貞八十一封吏部員外郎孔希德八十  
禮部郎中蔣廷暉七十八處士項伯藏九十三孫適郭  
文敏皆七十三又有稽勲郎中鄧林布政使姚肇以寓  
公與會而年不及

該聞錄言皮日休陷黃巢為翰林學士巢敗被誅今唐  
書取其事按尹師魯作太常寺丞皮子良墓志稱曾祖

日休避廣明之亂徙籍會稽依錢氏官太常博士贈禮部尚書祖光業為吳越丞相父璨為元帥府判官三世皆以文雄江東據此則日休未嘗陷賊為其翰林學士被誅也光業見吳越備史頗詳乃知小說謬妄無所不有師魯文章傳世且剛直有守非欺後世者可信不疑也按唐潯陽簿劉肅所著唐世語林已明載皮日休黃巢時遇害其子仕錢鏐矣

昔人以馮道比胡廣蓋言其遭際行履之同也漢順帝



五年胡廣已為尚書僕射又十年而以大司農為司徒  
質帝元年梁冀弑帝為太尉桓帝元年罷十月為司空  
五年致仕又四年以太常為太尉又二年梁冀誅為庶  
人又八年以太常為司徒又二年為孝靈元年參錄尚  
書事其年宦官殺陳蕃等進太傅錄尚書事封又四年  
卒凡事和順質冲桓靈六帝周流四公三十餘年馮道  
始事唐莊宗莊宗為明宗所篡事明宗三年由端明殿  
學士為中書侍郎同平章事廢帝為從珂所弑事從珂

以司空平章出鎮義成石晉滅潞王四年入為司徒侍  
中出帝初以太尉侍中鎮匡國契丹滅晉為太傅漢入  
洛為太師周篡漢以太師為中書令瀛王凡歷五國十  
一主出入將相三公者二十四年

五季時十國稱帝改元者七荆楚吳越常行中國年號  
歐公五代史著十國世家年譜於吳越云聞之故老亦  
嘗稱帝改元而事迹無可攷見獨得其封落星石為寶  
石山制書稱寶正六年辛卯所據止此按至正中徐一

夔避亂海寧州有許姓者嘗闢一巨室得古墓內有志  
磚蓋錢氏將許俊墓也俊年十八從軍以戰功累官至  
節度使都押衙兼御史中丞寶正三年卒葬於此所載  
年月甚明此又錢氏改元之一證惜歐公未之見耳鐸  
自梁末帝貞明二年加天下兵馬都元帥開府置官屬  
唐莊宗入洛以厚獻賜玉冊金印自稱吳越國王更名  
所居曰宮殿官屬稱臣遣使封拜海中諸國君長蓋居  
然行帝者事矣又何疑於改元一節乎哉

元僧楊連真伽發宋諸陵時有潛哀其骨而葬之者陶  
九成輟耕錄所載以為唐義士珏周德恭秉燭清談以  
為林義士珏瞿宗吉歸田詩話所載則以為林義士塾  
周公謹癸辛雜識則以為宋陵使羅銑鄭元祐遂昌雜  
錄則以為林景曦或又傳為王英孫云

古人避諱甚嚴如秦始皇諱政呼正月為征月史記年  
表又曰端月盧生曰不敢端言其過秦頌曰端平法度  
曰端直厚忠皆避正字也漢高祖諱邦漢史凡言邦者

皆曰國呂后諱雉史記封禪書野雞夜雉惠帝諱盈史  
記萬盈數作萬滿數文帝諱恒以恒山為常山景帝諱  
啓史記微子啓作微子開漢書啓母石作開母石武帝  
諱徹以徹侯為通侯蒯徹為蒯通宣帝諱詢以荀卿為  
孫卿元帝諱奭以奭氏為盛氏光武諱秀以秀才為茂  
才明帝諱莊以老莊為老嚴以辦裝為辦嚴殤帝諱隆  
以隆慮侯為林慮侯安帝父清河王諱慶以慶氏為賀  
氏魏武帝諱操以杜操為杜度吳太子諱和以禾興為

嘉興蜀後主諱宗以孟宗為孟仁晉景帝諱師以師保  
為保傅以京師為京都文帝諱昭以昭穆為韶穆昭君  
為明君三國志韋昭為韋曜愍帝諱業以建業為建康  
康帝諱岳以鄧岳為鄧岱山岳為山岱簡文帝鄭后諱  
阿春以春秋為陽秋晉人皮裏陽秋是也富春為富陽  
蘄春為蘄陽齊太祖諱道成薛道淵但言薛淵梁武帝  
小名阿練子孫皆呼練為絹隋祖諱忠凡言郎中皆去  
中字侍中為侍內中書為內史殿中侍御為殿內侍御

置侍郎不置郎中置御史大夫不置中丞以治書御史代之中廬為次廬至唐又避太子諱忠亦以中書郎將為旅賁郎將中舍人為內舍人煬帝諱廣以廣樂為長樂廣陵但稱江都唐祖諱虎凡言虎率改為武如晉書石虎但言石季龍武賁武丘武林之類是也高祖諱淵趙淵為趙文深楊淵為楊泉詩人謂陶淵明為泉明太宗諱世民唐史中凡言世皆曰代凡言民皆曰人如代宗諡即世宗民部曰戶部又所謂治人生人富人侯之

類是也高宗諱治唐史中凡言治皆曰理如東漢注引王吉語而曰至理之主才不代出者章懷太子避當時諱也武后諱曌以詔書為制書鮑照為鮑昭懿德太子重照改曰重潤劉思照改曰思昭睿宗諱旦張仁亶改曰仁愿玄宗諱隆基惠文太子隆範薛王隆業並去隆字君基太一民基太一並作其字隆州為閬中隆康為普康隆龕為崇龕隆山郡更名仁壽郡代宗諱豫以豫章為鍾陵蘇預改為源明以薯蕷為薯藥至宋避英宗



諱曙又改曰山藥簽署曰簽書德宗諱适改括州為處  
州憲宗諱純淳州更名藥州韋純改名貫之韋溥改名  
處厚王純改名紹陸溥改名質柳溥改名灌嚴純改名  
休復李行純改名行湛崔純亮改名仁範程純改名弘  
馮純改名約穆宗諱恒以恒山為平山敬宗諱弘徐弘  
改名有功文宗諱昀宋緄會要作宋混鄭涵避文宗舊  
諱改名瀚武宗諱炎賈炎改名嵩宣宗諱忱常諱改名  
損穆諱改名仁裕石晉高祖諱敬瑭拆敬氏為文氏苟

氏至漢而復姓敬宋朝避翼祖諱敬復改姓文或姓苟  
元后父諱禁以禁中為省中武后父諱華以華州為太  
州韋仁約避武后家諱改名元忠竇懷貞避韋后家諱  
而以字行劉穆之避王后諱以憲祖字行後又避桓溫  
母諱更稱小字武生虞茂避明穆后母諱改名預淮南  
王安避父諱長故淮南子書凡言長悉曰修晉以毗陵  
封東海王世子毗以毗陵為晉陵唐避章懷太子諱賢  
以崇賢館為崇文館王琯除會稽內史以犯祖諱會字

以會稽為鄮稽賈曾以父諱至不肯拜中書舍人韋聿  
遷祕書郎以父嫌名換太子司議郎柳公綽遷禮部尚  
書以祖諱換左丞柳宗元遷監察御史以祖諱察上表  
避職詔不許李涵為太子少傅呂滑劾涵不避父名少  
康劉溫叟以父諱岳不聽絲竹之音李賀以父名晉肅  
不赴進士舉司馬遷以父諱談史記趙談曰趙同張孟  
談為孟同范曄以父諱泰後漢書郭泰曰郭太李翱祖  
父諱楚金故為文皆以今為茲錢王諱鏐以石榴為金

櫻改劉氏為金氏楊行密據揚州揚人呼蜜為蜂糖趙  
避石勒諱以羅勒為蘭香宋高祖父諱城以武成王為  
武明王以武成縣為武義縣古人避諱似此甚多不可  
勝舉聞見錄謂德宗立議改括州適處士星應括州分  
野遂改為處州處州合上呼呼去聲非也容齋隨筆謂  
嚴州本名睦州宣和中以方寇改嚴州蓋取嚴陵灘之  
意子陵乃莊氏避明帝諱以莊為嚴合為莊州李祭酒  
涪謂晉諱昭改名侶案說文自有侶穆字以昭為侶蓋

借音耳三公之論如此又觀韓退之諱辯謂武帝名微  
不聞又諱車轍之轍今史記天官書謂車通此非諱車  
轍之轍乎謂馬遷史記不言談今李斯傳言宦者韓談  
滑稽傳談言微中此非史記言談乎又謂漢書無莊字  
今爰盎傳上益莊鄭當時傳鄭莊千里不齎糧茲非漢  
書言莊乎漢書注以景字代丙字如干支景戌景辰景  
子景科景令之類晉書與唐人文字皆然緇素雜記亦  
莫曉所以攷之蓋唐初為世祖諱耳

古稱聰敏善記者聊記一二張安世武帝幸河東亡書  
三篋安世識之具作其事後購得書以相校無所遺失  
見漢書應奉凡所經履莫不暗記讀書五行並下為郡  
決曹史行部四十二縣口說罪繫姓名坐狀輕重無所  
遺脫常於彭城相表賀家有車匠於門內開扇出半面  
視奉後數十年於路見車匠識而呼之見謝承漢書延  
篤嘗借堂谿典左氏傳本諷之糧盡辭歸典曰卿欲寫  
傳何故辭歸篤曰已諷之矣見先賢行狀陸續為郡曹

史饑荒太守使於都亭賦民饘粥事畢說六百餘人分  
別姓名無有謬誤見後漢書禰衡見蔡伯喈所為碑一  
過視之後援筆書之無所遺失惟第四行中石磨滅兩  
字不分明見別傳王粲與人共讀道旁碑背而誦之不  
失一字觀人圍碁局亂粲為覆之比較不誤一道見魏  
書張華強記默識四海之內若指諸掌武帝嘗問漢宮  
室制度及建章千門萬戶華應對如流畫地成圖見晉  
書夏侯綰賓客百餘人人一奏刺悉書其鄉里名氏世

所謂爵里刺也客示榮一寓目使之遍談不謬一人見世語邢邵因霖雨讀漢書五日略能遍之廣尋經史五行俱下一覽便記嘗與客在北海王昕舍宿飲相與賦詩凡數十首皆在主人奴處旦日奴行諸人求諸邵皆為誦之見北史裴諏之嘗從常景借書百卷十許日便返景疑其不能讀每卷策問應答無遺見北齊書傳昭魏晉以來官宦簿伐姻連內外舉而誦之無所遺失見南史楊愔聽記彊識半面不忘每有召問或單稱姓或




單稱名罔有誤者後有選人魚漫漢自言猥賤獨不見  
識惜曰卿前在元子思坊騎禿尾草驢經見我不下以  
方趨障面我何不識卿見本傳抑慶僧習子也曝書僧  
習於雜集中取賦一篇千有餘言慶立讀便即誦之無  
所遺漏見後周書虞世南太宗令寫列女傳屏風已裝  
未及求本乃暗書之一字無失見國史補又太宗嘗出  
行有司請載副書以從帝曰不須虞世南在此行祕書  
也見隋唐嘉話崔仁師為度支郎中嘗奏度支財物數

千言手不執本太宗怪之令杜正倫齋本仁師對唱一  
無差殊見舊唐書蕭穎士與李華陸據遊洛龍門共讀  
路旁古碑穎士一閱即能誦華再閱據三方能記之議  
者以三人才格高下如此見本傳顏真卿調犀浦主簿  
嘗送徒益州忘其籍至廷口記物色凡千人無所差長  
史陸象先異之見唐史魏奉古授封丘尉嘗九日公宴  
有客草序五百言奉古言此舊文援筆倒疏之草序者  
默然自失奉古徐笑曰適覽記之非舊習也因是知名

見小史張巡生平書不再讀人抽案上書隨意叩之無  
不背誦雍丘城中人一見面即識姓名狀貌無有遺誤  
見韓文公書張中丞傳後柳芳開元中有李幼奇對芳  
念百韻詩芳暗記便頓之於壁不差一字曰此吾之詩  
也李不平芳徐云聊相戲耳因請幼奇更誦所著文章  
皆一遍便能寫錄見尚書故實張方平穎悟絕人家貧  
無書常就人借三史旬日輒還曰吾已得其詳矣凡書  
皆一閱終身不再讀屬文未嘗起草見墓誌蘇文忠公

軾在詔獄中丞李定一日語客曰蘇軾真奇才也人愕  
莫敢對定曰所作詩文雖數十年前所引用書籍故事  
問之無一遺謬者見長公外紀王性之讀書能五行俱  
下以文投贄者且觀且捲俄頃即置之工拙皆能記肅  
王與沈元用同使虜館於燕山愍忠寺寺中有一唐人  
碑凡三千言元用素彊記即朗讀一再肅王不視且聽  
且行若不經意元用歸欲矜其敏取紙追書之不能記  
者凡闕十四字書畢肅王視之即舉筆盡補其所闕又

改元用謬誤四五處置筆他語畧無矜色元用駭服并  
見老學菴筆記



說畧卷八

欽定四庫全書

子部  
說略卷十九

詳校官中書<sub>臣</sub>孫球

主事<sub>臣</sub>祁韻士覆勘

總校官庶吉士<sub>臣</sub>何思鈞

校對官中書<sub>臣</sub>楊世綸

謄錄監生<sub>臣</sub>潘衡

欽定四庫全書

說畧卷九

明 顧起元 撰

史別下

師曠識駁馬諫珂

孤身鳥首

識首陽之神

狸身狐尾

又知勞薪管

子知俞兒

卑耳溪神

又知駁馬子產

知實沈臺駘楚君子識

鵬雛董仲舒知重常

鳥見論衡

東方朔識駙牙識巫雀識

藻廉

水木之精長八九寸

識怪哉知畢方

獨足鶴

又云識鵬雛

見異類傳

張寬知女人星劉向知貳負

上郡山中械一足屍

竇攸知鼯鼠一



云是終軍賈逵知鸞驚蔡衡知青鸞王粲知服器人冢

吳胡綜知銅匣中玉如意為秦始皇厭王氣物諸葛恪

知侯囊

山精如小兒

陸敬叔知彭侯

狀如黑狗無尾

晉張華知龍鮓

以苦酒沃之五色

知海鳧毛知干將知臨平石鼓

以蜀中桐材刻為魚形叩

鳴之則

知銅澡盤

晨夕鳴與洛中宮鐘相應

知九館龍洞有癡龍知然

石

以水灌之便熱

知玉漿龍穴石髓束皙知顯節陵科斗策賈

淵知苟晞兒冢董養知周會狄地

下有蒼白鳥飛去

釋道安知

魯襄公鼎王莽銅斛裴子野知白題國何承天知亡新

威斗王僧虔知楚王冢中科斗書考工記劉杳知紫荷

橐知長頸王又知千里酒又知古犧尊沈約知東夷罍

蓋

瓦具高九尺銳下平蓋中有紉一蓋窆具也

又知焦明鳥

出東陽郡中

劉顯知

古文尚書逸篇斛斯微知鎔子

以芒筭振之

祖瑩知于闐國

王所獻古玉印崔躋知藍田山玉人陸澄知服匿

單于賜蘇

武酒器

李珽知內黃蘇綽知西漢故倉地李章武知鐵斧

為禁物傳奕知金剛石許敬宗知帝丘孟詵知藥金歐

獻乘知息壤段成式知報時鐵傳弘業知雌

形如豕仰鼻長尾有

岐盧若虛識鼯鼠

豹首虎臆  
大如拳

留源知地囊為冤氣所結

范德昭知蜀興義門雙石笋為蠶叢啟國鎮蜀之碑杜

鎬知秦哀公墓又知雀錫僧贊寧知畫牛隱見又知海

馬骨劉敞知龍雀刀

赫連勃  
勃鑄

又知周惡夫印為亞夫印

劉放知駁馬劉蛻知古銅盎非齊桓公物高裕知陵鯉

耶律楚材知角端

世說謂李元禮謾謾如松下風青州先賢傳又謂周孟

玉瀏瀏如松下風李膺家傳又謂南陽朱公叔颺颺如

行松栢之下語林又云郭林宗與李膺共載乘薄笨車  
上大槐坂觀者望之若松喬之在霄漢家傳稱李膺嶽  
峙淵清海內先賢傳稱許子將亦曰山峙淵停家傳稱  
李膺顧顧如玉山世說又稱裴叔則朗朗如行玉山後  
漢書楊震號關西夫子北史裴瓛稱薛道衡亦曰關西  
孔子世說許玄度停都一月劉尹無日不往乃歎曰卿  
復少時不去我成輕薄京尹南史孔廣美容止善談論  
張緒數巾車詣之每歎曰孔廣使吾成輕薄祭酒

晉平公出言而不當師曠舉琴而撞之跌衽宮壁魏文  
侯出言而不當師經舉琴而撞之中旒潰之一見淮南  
子一見劉向說苑燕太后不肯以少子質齊因陳翠愛  
少子之說而許趙太后不肯以少子質秦因左師觸龍  
愛少子之說而許一見趙世家一見戰國策高齊神武  
不貴慕容紹宗以留文襄唐文皇暫出李勣以留高宗  
俱見本紀申鳴援桴而進戰為賊殺其父功成而自殺  
趙苞援桴而進戰為賊殺其母功成而歐血死一見說

苑一見後漢書醫緩脈晉平公而曰君之病在膏之下  
肓之上秦武王示扁鵲病而曰君之病在耳之前目之  
上謂皆以色致也一見左傳一見戰國策東方朔知赤  
物為怪哉飲酒十石李章武知鐵斧為厭物飲酒三斗  
一見搜神記一見酉陽雜俎懷素習書盡數畝芭蕉鄭  
虔習書盡數屋椽葉俱見法書錄孫臏臏於魏而為齊  
師司馬喜臏於宋而為中山相一見本傳一見呂氏春  
秋王濟以錢千萬與王愷賭射八百里牛一勝而探牛

心爾朱文略以好婢與高歸彥賭射千里馬一勝而截馬頭一見晉書一見北齊書鄂千秋明蕭何功高立封侯公孫戎明樊噲不反立封二千戶一見蕭何傳一見王莽傳兗州刺史李恂郡園小麥胡麻悉付從事揚州刺史費遂郡園小麥胡蒜悉付從事一見東觀漢記一見謝承後漢書孫權得諸葛恪而以老素熟龜精張華得雷煥而以老素辨狐精一見搜神記一見集異志漢郭林宗遇雨中角折人遂為折角巾周獨孤信馳馬帽

微側人遂為側帽一見後漢書一見北史嚴峻為吳大帝誦孝經仲尼居張輔吳昭以為鄙生請誦君子之事上章陸澄為齊武帝誦孝經仲尼居王衛軍儉以為博而寡要請誦君子之事上章一見吳志一見南齊書吳大帝夢人以筆點額熊循賀以為當作主齊文宣夢人以筆點額王曇首賀以為當作主俱遂即位一見吳祚國統志一見齊書魏文帝為王時夢日墮地分為三分已得一分納懷中陳文帝微時夢亦然後俱為三分之



主一見談藪一見陳本紀張茂先白鸚鵡夢為鷺鳥搏  
揚太真白鸚鵡亦夢為鷺鳥搏一見異苑一見明皇雜  
錄歐陽率更見索靖碑初看云浪虛得名次日看曰名  
下定無虛士坐卧其下十日不能去閭立本見張僧繇  
畫亦然見宣和書畫譜楊司空素出見客挾侍姬紅拂  
因奔李靖郭太尉子儀出見客亦挾侍姬紅綃因奔崔  
千牛一見虬髯客傳一見崑崙奴傳二人又皆劍俠也  
被甲上馬以示可用人知馬援不知其事先見於廉頗

葬母擇萬家之地人知韓信不知其事先見於秦太后  
日暮途遠倒行逆施人知主父偃不知其事先見於伍  
子胥高鳥盡良弓藏人知韓信不知其事先見於范蠡  
飲醇酒弄婦人人知陳平不知其事先見於信陵君敗  
軍之將不可語勇人知廣武君以此對韓信不知范蠡  
以此語越人不知佞人為誰人知唐太宗以此斥宇文  
士及不知魏常以此語高歡

聖主時投水人知有卞隨務光而不知有北宮無擇騎

青牛人知有老子而不知有封達生空桑人知有伊尹而不知有孔子白魚入舟人知有周武王而不知有宗明帝河澌冰合人知有漢光武之滹沱而不知有慕容德之黎陽抱甕出灌人知有漢陰丈人而不知有衛之五丈夫鳳雛號人知有龐統而不知有顧邵獻胙加毒以讒賜死人知有晉獻公子申生而不知有秦孝文王子西蜀侯惲吞珠紹吏人知有伍負而不知又有張丑思妾令方士致魂人知漢武之於李夫人而不知宋武

之於殷淑儀火牛人知有齊田單而不知有宋王則治  
阿譽聞而阿不治人知有齊威王之大夫而不知景公  
之晏子夢寐求相人知高宗之傳說而不知文王之臧  
丈人題壁作龍蛇歌人知有介子推而不知舟之僑逆  
旅人勸就國人知有太公而不知有鄭桓公說喻土梗  
人知有蘇秦之於李兌而不知有蘇代之於孟嘗君許  
秦地而背之人知張儀之於楚懷王而不知馮章之於  
楚王山節藻稅人知有臧文仲而不知有管仲先食不

死之藥巧言以免死人知方朔之於漢武帝而不知中  
射之士之於楚王一字直百金人知淮南子而不知公  
孫子孝母湧泉出魚人知有姜詩而不知有後周陸通  
妻棄夫人知朱買臣而不知太公望沈江負父屍人知  
有會稽之孝女曹娥而不知符縣光尼和之女終又樊  
道張負妻黃氏名帛沈江負夫屍掘地得石槨人知有  
滕公而不知有衛靈飛廬客至門號登龍門人知有李  
膺而不知有袁昂又王衍亦謂一世龍門任昉為中丞

與其宴者亦曰龍門之遊續太史公史記人知褚先生  
而不知劉向劉歆馮商揚雄史岑梁審肆仁晉馮段肅  
金丹馮衍韋融蕭奮劉恂相次撰續迄於哀平皆名史  
記看竹不問主人知有王徽之而不知有袁粲倚柱讀  
書雷震不輟人知有夏侯玄而不知有諸葛誕獲偷侍  
兒人試文不殺因以賜之人知有楊素之於李伯樂而  
不知有蔡興宗之於孫敬玉侍婢環侍執飲饌人知有  
王武子而不知有楊國忠孫晟國忠晟又俱號肉臺盤

羊羹不偏致敗人知華元之於御斟而不知中山王之  
於司馬子期乳生潼人知有元德香而不知有李善綵  
衣娛戲人知有老萊而不知有伯瑜知囊人知有晁錯  
而不知有樗里子魯匡桓範唐王德儉讀易至損益而  
歎人知有向平而不知有孔子佩六印人知有蘇秦而  
不知有樂大以石為虎射之沒羽人知有李廣李速而  
不知有熊渠養由基飛將人知有李廣而不知有呂布  
倒用印人知有段秀實之阻朱泚而不知有李崧之安

蜀人主前席人知有賈誼而不知有商鞅蘇綽飲千日  
酒至期發冢而醒人知有劉玄石而不知有趙英日食  
萬錢猶云無下箸處人知有何曾而不知有任愷御屏  
隔座人知有漢鄭弘第五倫而不知有吳紀亮紀騭杯  
中蛇影人知有樂廣之弓而不知有南皮令應柳之弩  
而風俗通又以為杜宣殺孝婦大旱人知有前漢之東  
海而不知有後漢之上虞萬石君人知有石奮而不知  
有東漢馮楊秦襲唐張文瓘留犢事人知有時苗而不



知有羊扁食脫粟人知有公孫弘而不知有晏嬰錢神  
論人知有魯褒而不知有胡毋氏成公綏獲倫侍兒人  
以侍兒賜之人知有袁盎之吳司馬而不知有張說之  
書生陳蕃下榻人知有徐穉而不知有周璆雪中高卧  
人知有袁安而不知有胡定定又字元安夢贈筆人知  
有江淹而不知有王彪之王珣紀少瑜陸倕李嶠和凝  
暎酒救火人知有樂巴而不知有樊英邵信臣郭憲佛  
圖澄成武丁入水戮蛟人知有周處而不知有澹臺子

羽荆飲飛菑丘訐襄陽太守鄧遐羊車游後宮鹽水酒  
地人知有晉武而不知有宋文御膳有髮自數三罪以  
免死人知晉平公之庖人而不知先武之陳正因病嘗  
糞人知越王勾踐之於吳王而不知郭霸之於魏元忠  
以酒賜妬婦飲之無恙人知太宗之於房玄齡而不知  
莊宗之於任圜立試萬言倚馬可待人知有李太白而  
不知前有袁虎後有劉原父即席盡器飲酒歸而尚醒  
稱所得器人知裴弘泰之於裴鈞而不知潘炕之於朱

梁太祖下第獻燕詩座主明年登第人知有章孝標而不知有于化成刻石高山深谷人知有杜預而不知有顏真卿賜行酒人炙人知有顧榮而不知有何遜陰鏐步金蓮事人知齊東昏之潘妃而不知李後主之官娘一箭落雙雕人知有斛律光而不知有拓拔幹高駢錦纜事人知有隋煬而不知有甘寧還帶陰德至相位人知有裴中令而不知有白中令少孤門生廢蓼莪人知有王裒而不知有顧歡入山妻二仙女久而歸人知有

天台之劉晨阮肇而不知有剡縣之袁狼碩因食辨勞  
薪人知有荀勗而不知有師曠及東晉牛鐸強索妻人  
知有武承嗣之於喬知之而不知有阮佃夫之於何恢  
聞鼓角聲加敬人知有范雲之於梁武而不知有劉仲  
舉之於陳武翦鬚賜臣合藥人知有唐太宗之於李勣  
而不知有宋仁宗之於呂夷簡告靈不仕人知有王羲  
之而不知有何偃它心觀人知忠國師之於大耳三藏  
而不知普寂之於柳中庸祭賽忘書刀在廟鯉魚為送

人知有馬當山之王昌齡而不知有宮亭湖之估客奕  
棋覆局人知有王粲而不知有到溉製千字文人知有  
周興嗣而不知有蕭子範贈妾人知有韓翃之章臺柳  
而不知有鄭還古之沈真真誤食澡豆人知有王敦而  
不知有陸暢縱囚來歸人知有唐太宗而不知有梁王  
志隋王伽殞逆旅書生人知有王忱而不知有鮑子都  
廖有方橋神貌醜以足潛畫之人知有定州之張平子  
而不知有忖留神之魯般又不知有秦始皇造橋海神

之工人見水經注駱駝負水養魚人知有宋孫仁祐而不知有隋虞孝仁愛妓被奪賦詩復還人知于頔之於崔郊秀才不知頔又於戎昱使君又江陵一刺史於寓居士殺負心僕人知有張詠而不知有柳開金蓮送歸人知有蘇軾而不知有令狐綯王珪史浩登第娶瞽女人知有劉庭式而不知有呂黃寫石經人知有蔡邕馬日磾而不知有嵇康乞食歌姬阮人知有韓熙載而不知有裴休三傑人知張良蕭何韓信而不知宋璟張說

源乾曜又程顥張山甫朱光庭又富嘉謨吳少微魏谷倚亦稱北京三傑又三國志注傳子以孔明雲長翼德為三傑四傑人知王楊盧駱不知宋之韓范富歐亦有此號又瘦沈前有約後有昭畧寄怨詩之竇前有玄後有滔望車塵之潘前有黨後有岳善畫婦人為帝殺之毛前有延壽後有惠遠致冰鮮之王前有祥後有延弔客驢鳴之王前有粲後有濟銅錢作埒之王前有濟後有元寶立銅柱之馬前有援後有摠射石之李前有廣

後有速種玉得妻之陽前有洛陽雍伯後有盧龍翁伯  
怖小兒之麻胡前有秋後有祜書紅葉之鄭前有虔後  
有谷

周左丘明春秋時左丘明唐張說宋張說漢張儉宋契  
丹張儉秦王猛陳王猛春秋王豹戰國王豹漢吳祐元  
吳祐唐王溥宋王溥春秋魏相漢魏相隋李綱宋李綱  
漢李膺梁李膺陳王通隋王通晉張載宋張載後魏王  
建唐王建五代王建唐王珪宋王珪漢昭帝時衛尉王



莽漢末篡位王莽漢王允晉王允吳孫登晉孫登北齊  
王則宋王則後漢王霸又隱逸王霸前漢丞相公孫弘  
後漢虞延傳幽州從事公孫弘漢朱買臣梁朱買臣漢  
李廣北齊李廣戰國王歡晉王歡唐楊巨源宋楊巨源  
晉李密唐李密晉王祥梁王祥漢揚雄隋揚雄梁侯景  
北齊侯景戰國王良漢王良又如唐堯而漢有唐堯為  
臨武長諫止荔枝之貢後人改為堯虞舜而梁書有虞舜為  
太常丞常獻明堂之議士勾士鞅之父也而乃相鞅壽

夢吳王之臣也而乃臣越書載四代亦既該兩伯夷

虞

之秩宗一乃  
諫武王者

論語一書乃有兩南宮括孔門高弟有公

孫龍晉代羌帥有顏回仕符健者又一王羲之佐慕容

德者又一張華古有容成氏而黃帝之臣亦曰容成伏

羲曰蒼牙而天雷之吏亦曰蒼牙羲臣曰巫咸而又來

又商家白帝曰未宣而又為唐刺濮離婁事黃帝則論

彼商臣張若事黃帝則指夫秦士

婁若並見莊子張  
若蜀郡太守也

趙

隱事商國而亟舉魏賢

魏黃門趙隱  
唐宰相趙隱

馮夷友費昌而竟

談河伯商均曰叔均后稷之孫亦曰叔均隰朋曰齊臣  
黃帝之臣亦曰隰朋風后軒帝師也玄女戰經禹又問  
乎風后伍胥楚族也玄女兵法黃帝又臣夫伍胥上古  
赤松子皇初平亦號赤松季連陸終子季克子亦曰季  
連仲衍為孟戲之弟而紂之兄亦曰仲衍孔甲為黃帝  
之史官而孔子之孫亦曰孔甲又若帝嚳之臣有窮之  
君俱曰羿而俱以射名少昊之子魯國之士皆曰般而  
皆因巧著

湘東王有同姓名錄其書今不存聊舉其灼灼者在同  
時如兩曾參一曾參殺人而致曾子之母投杼兩毛遂  
一毛遂墜井而致平原君之痛哭異世則魯秋胡因婦  
採桑調其妻投水死漢亦有魯秋胡求聘翟公女翟公  
誤傳調妻事以為薄行而不許婚俱可笑也其次如國  
師公劉秀以名應圖讖為王莽所殺至取王莽者為光  
武亦劉秀莽遣太師安新公王匡攻更始定國上公王  
匡不勝為所執殺唐李尚書益與宗人尚書益者俱赴

飲據上坐因笑曰今日兩副坐頭俱李益代宗用韓翃  
知制誥宰相以平盧幕府貲外及江淮刺史請上書春  
城無處不飛花絕句云用此韓翃而貲外得之事皆奇  
又按路史載漢兩龔遂俱為郡太守兩京房俱明易災  
異晉王氏一譜而有兩王愷一茂仁一君夫兩王綏一  
戎子一愉子兩王乂一緒父一衍父兩王澄一濟弟一  
衍弟兩王安期一含子一湛子又劉弘古今有十一王  
褒有十二張良有九張敞王吉皆有八又陸善經亦著

有同姓名錄

古之多力人如桀能伸鐵鉤索其臣捱移大戲水殺黿  
鼉陸捕熊虎紂能倒曳九牛撫梁易柱又生捕熊虎指  
畫殺人費仲惡來足走千里手制兕虎又崇侯虎等舉  
六百石重沙者二十四人蜀五丁力士能移山舉萬鈞  
每王薨輒立大石長三丈為墓志曰笋里秦烏獲及夏  
育俱能舉移千鈞衛石蕃能負沙一千二百斗項王舉  
鼎拔山喑鳴叱咤千人皆廢魏任城王曹彰太廟新成

萬斤鐘負之而趨擗白象鼻頓之於地以臂繞虎尾伏不敢動北魏盧曹長九尺餘勇力與沙門曇讚埒嘗以海神脰骨為馬稍以遺神武諸將莫能舉惟彭樂強舉之南梁羊侃伏而作虎狀以指挾壁入三寸弓力至二十石泗州十石人各長八尺許執而對擊之俱碎又於壁直上七步橫蹋得五跡唐宋令文有牛觸人令文接兩角拔之應手而倒頸骨皆折而死又以五指撮碓背壁上書四十字詩為太學生以一手挾講堂柱起以同

房生衣於柱下壓之

古人夙惠者多矣聊摘記其凡顓頊年十二而治天下  
見新序蒲衣子八歲為舜師見皇甫謐高士傳荀仲豫  
稱禹十二為司空見傅子管仲妾倩云罽子生五歲而  
佐禹見列女傳周王太子晉生八歲而服師曠見尸子  
荊公子年十五而相荊見說苑項橐生七歲為孔子師  
見新序甘羅年十二秦封為上卿見戰國策楊烏九歲  
而與玄文見法言黃香年十二博覽傳記見東觀漢記



桓麟年十三四有異才能作詩賦見文士傳徐穉十一  
歲對郭林宗伐宅樹見漢史黃琬年七歲為祖瓊對日  
食狀見後漢書孔融十一歲造李膺門見世說崔琰九  
歲舉秀才見魏書夏侯榮七歲能屬文日誦千言經目  
輒記見世語虞翻年十二好學有高氣見吳書張純張  
儼朱異俱童年見朱據各賦一物見文士傳陸雲六歲  
便能賦詩見別傳賀循童齒不羣言行進止必以禮讓  
見晉書戴逵總角以雞卵汁澣白瓦屑作鄭玄碑又為

文自鐫詞麗器妙見本傳謝朓十歲能屬文父莊遊土  
山使朓命篇攬筆便就見世說劉璛年五歲聞舅讀管  
寧傳欣然欲讀見南史任昉四歲誦詩數十篇八歲能  
屬文自製月儀詞義甚美見本傳昭明太子五歲徧誦  
五經見梁書到沈五歲見父於屏風抄古詩教讀一遍  
便能諷誦邢邵十歲能屬文日誦萬言見北史陸瓊六  
歲為五言詩頗有詞彩何遜八歲能賦詩徐勉六歲為  
祈禱文見稱耆舊並見本傳虞荔年九歲候陸澄澄問

五經凡有十事荔隨問輒應無有遺失見陳書李百藥  
七歲能屬文知鄆國在琅琊見隋書賈嘉隱七歲舉神  
童召見見語林王勃六歲解屬文構思無滯詞情英邁  
見舊唐書賈言忠數歲日誦萬言孫思邈七歲日諷千  
言並見唐世說蘇頌五歲便指意於文坐卧吟諷未嘗  
暫輟八九歲有若大成見韓休集序宋璟七歲能屬文  
八九歲夢大鳥銜書吐口中而吞之藻思日深見顏真  
卿撰神道碑蕭穎士四歲屬文觀書一覽即誦見舊唐

書劉晏八歲獻東封頌以神童為祕書正字見明皇雜  
錄李泌年七歲能賦敏捷見鄴侯外傳楊綰年四歲處  
羣衆人敏識過人見舊唐書權德輿生三歲知變四聲  
四歲能賦詩積思經術無不貫綜見本傳高郢九歲通  
春秋能屬文子定年七歲讀尚書以湯誓難父郢不能  
對見舊唐書弘農楊牢絕乳即能詩見芝田錄崔鉉童  
兒時工詩韓滉命咏架上鷹命牋筆畧無停思見南楚  
新聞白居易生六七月即識之無二字指之百試不差

見長慶集韋溫七歲日念毛詩一卷十一歲應兩經舉  
登第見舊唐書張同子名策年十三啟辨鼎銘黃初元  
年春二月之謬同大異之見五代史王元之五歲能詩  
太守命咏白蓮見古今詩話黃庭堅年五歲已誦五經  
八歲賦詩有云君到玉皇香案前若問舊時黃庭堅謫  
在人間今八年見道山清話胡蒙溪真珠船又載唐人  
幼慧者令狐楚五歲能詞章杜甫七歲屬辭徐彥伯張  
九齡裴敬彝皆七歲能文李賀七歲作高軒過孔穎達

八歲日誦千餘言闇記三禮義宗李白十歲觀百家十三能文史張童子九歲明二經與韓愈同舉禮部拜衛兵曹郅士美十二通五經史漢皆能成誦柳公權十二工詞賦今之豚犬但解覓梨棗耳述之以勉兒輩

先秦以前美人宮掖則有少昊之皇娥赤帝女之瓊樹桀之妹喜紂之妃已有羊氏周穆王之盛淑人昭王之延娟延娛幽王之褒姒楚王之息媯晉獻公之驪姬秦穆之女弄玉惠文之華陽夫人莊襄王之邯鄲姬吳王

之西施

光即夷

鄭旦

明即修

楚王之鄭袖南威陽文李園妹

梁惠王之閭姬趙武靈王之吳姚燕昭王之旋娟提嫫

中山侯之陰后江姬在下則有仍氏青琴毛嬙孔父妻

徐吾犯妹夏姬朱婁顏夫人漢以後宮掖則高祖之戚

夫人文帝之慎夫人武帝之陳后阿嬌衛后子夫邢夫

人尹夫人李夫人王夫人鈎弋夫人麗娟元帝之王昭

君成帝之趙后飛燕趙婕妤合德光武之陰后麗華魏

文帝之甄后郭后薛靈芸莫瓊樹陳尚衣陳巧笑吳大

帝之趙夫人潘夫人吳主和之鄧夫人吳主亮之朝姝  
麗居洛珍潔華孫策周瑜之二喬晉武帝之兩楊后胡  
嬪芳宋孝武之殷淑儀齊東昏之潘妃玉兒北齊後主  
之馮小憐陳後主之張麗華孔貴嬪隋文帝之陳宣華  
蔡容華煬帝之朱貴兒侯夫人袁寶兒吳絳仙唐玄宗  
之武惠妃楊太真梅妃武宗之王才人李後主之兩周  
后宋徽宗之兩劉妃閨閣則秦羅敷晉顧夫人齊臨川  
王宏之江無畏荀奉倩之婦曹氏桓溫之李勢女陳之



樂昌公主王仙客之無雙失行則卓文君鶯鶯非烟號  
國夫人達奚盈盈狄夫人姬侍則袁術之馮方女魏之  
絳樹石崇之翔風綠珠宋禧羊侃之張靜琬孫荆玉魏  
元雍之徐月華修容豔姿李密之雪兒羊鑒之阿劉李  
靖之紅拂崔生之紅綃元載之薛瑤英寧王憲之寵姐  
李聽之紫雲李愿之真珠潘炕之解愁名伎則薛瓊瓊  
陳嬌如霍小玉李娃楚娘夜來杜韋娘史鳳楚蓮香劉  
採春李師師

王昭君事詩人雅好詠之自石季倫明妃詞後不可勝紀杜工部詩云千載琵琶作胡語分明怨恨曲中論白少傅詩云漢使却回憑寄語黃金何日贖蛾眉君王若問妾顏色莫道不如宮裏時歐陽文忠詩云耳目所及尚如此萬里安能制夷狄皆以昭君入胡心不忘漢致吊而閔之之意獨王荆公有漢恩自淺胡自深之句人遂緣是以覘其非純臣要而論之昭君本非貞女荆公之言未必非諸公之言未必實也按前漢書匈奴傳元

帝以後宮良家子王嬙字昭君賜呼韓邪單于又言王  
昭君號寧胡閼氏生一男伊屠知牙師為右日逐王呼  
韓邪死其子雕陶莫臯立為復株累若鞮單于復妻王  
昭君生二女長女為須卜居次小女為當于居次後漢  
書南匈奴傳知牙師者王昭君之子也昭君字嬙南郡  
人也初元帝時以良家子選入掖庭時呼韓邪來朝帝  
勅以宮女五人賜之昭君入宮數歲不得見御積悲怨  
乃請掖庭令求行呼韓邪臨辭大會帝召五女以示之

昭君豐容靚飾光明漢宮顧景裴回竦動左右帝見大  
驚意欲留之而難於失信遂與匈奴生二子及呼韓邪  
死其前閼氏子代立欲妻之昭君上書求歸成帝勅令  
從其俗遂復為後單于閼氏焉西京雜記云元帝後宮  
既多不得常見乃使畫工圖形象圖召幸之諸宮人多  
賂畫工獨王嫱不肯遂不得見匈奴入朝求美人為閼  
氏於是上案圖以昭君行及去召見貌為後宮第一善  
應對舉止閒雅帝悔之而名籍已定帝重失信於外國

故不復更人乃窮索其事畫工毛延壽等皆棄市琴操  
曰王昭君者齊國王穰女也年十七儀容絕麗以節聞  
國中長者求之皆不許乃獻漢元帝帝造次不能別房  
帷昭君恚怨之會單于遣使帝令宮人裝出曰欲至單  
于者起昭君喟然越席而起帝視之大驚悔是時使者  
並見不得止乃賜單于觀此諸書所記相戾如琴操所  
言則昭君之始也以不得幸御恚憤不堪而自請入胡  
其後呼韓邪死又不能自守遂復為後單于閼氏行此

乃淫佚之女何云以節聞哉樂府解題又云昭君有子  
曰世違單于死世違繼立匈奴之俗父死妻母昭君問  
世違曰汝為漢也為匈奴也對曰為匈奴耳昭君乃吞  
藥自殺夫昭君所生子自名知牙師其繼呼韓邪立者  
乃雕陶莫皋是呼韓邪大閼氏之子昭君配之所生二  
女王莽時曾諷令須卜居次入侍元后兩漢史所紀明  
白如此何乃為此亡稽之言邪後世遂有昭君死節及  
青冢之說學士王達筆疇中常責昭君遠嫁匈奴不死

於中路及至見腥羶而後亡不亦晚乎不知昭君不惟不死且不恥為兩單于妻矣太倉陸之箕曾於筆疇中牋記之金壘子又備言其詳詩人徒以美豔失身異地過為閔惜所謂未見好德如好色也

近內黃野中掘得鄭恒墓志乃給事郎秦貫撰其叙恒妻則博陵崔氏世遂以崔為鶯鶯按會真記雖謂鶯鶯委身於人而不著名氏鄭恒之名特始見於西廂傳奇蓋烏有之辭也世以墓志之名偶與烏有之辭合而鄭

恒之配又偶與鶯鶯之氏同遂以墓志之崔為鶯鶯誤也況會真記止云崔氏孀婦將歸長安不言博陵又無緣葬在內黃且墓志之崔以大中九年正月十七日病終享年七十有六邇其生當在德宗建中元年庚申若鶯鶯之生會真記以為甲子歲乃興元元年少庚申四歲墓志屬續之期蓋得於鄭氏家狀會真記設悅之歲蓋得於鶯母自言並不應少誤鄭恒之配殆別一崔氏也



章臺柳以李將姬柳氏得名韓貧外甥所謂縱使長條似舊垂也應攀折他人手者也陽臺柳亦以蜀妓柳氏得名御史所謂從今喚作陽臺柳舞盡春風萬萬條也韓退之侍兒名柳枝所謂別來楊柳街頭樹擺亂春風只欲飛者也白樂天侍兒亦名柳枝所謂兩枝楊柳小樓中嫋嫋多年伴醉翁者也李義山屬情洛中婦亦名柳枝所謂畫屏繡步障物物自成雙者也楊廉夫侍兒亦名柳枝所謂竹枝柳枝桃花吹彈歌舞弄琵琶

可憐一箇楊夫子化作江南散樂家楊基亦寄之詩云  
長笛參差吹海鳳小璫楊柳舞妖魔而聶大年讀廉夫  
集云白髮草玄楊子宅紅粧檀板謝家湖蓋指此也

古妓女之雙名者蘇小小南齊錢塘名倡也見樂府廣  
題薛瓊瓊開元宮中第一手為崔懷寶所私者見麗情  
集關盼盼張建封妓女守節於燕子樓張好好杜牧之  
云故吏部沈公在江西幕好好年十三以色藝來樂籍  
中隨公移置宣城後為沈著作所納見之於洛陽東城

感舊傷懷題詩贈之并見本事詩灼灼錦城官妓也善  
歌舞相府筵中與河東人目成自此不復面以軟綃裹  
紅淚寄之見麗情集東東竇鞏從軍有吊妓東東一篇  
云芳菲美豔不禁風未到春深已墜紅惟有側輪車上  
驛耳邊常似叫東東見抒情集端端崔崖張祐嘲李端  
端云黃昏不語不知行鼻似烟窻耳似錨愛把象牙梳  
掠鬢崑崙頂上月初生後又更贈云覓得驕驄被繡鞍  
善和坊裡取端端揚州近日渾成詫一朵能行白牡丹

見雲谿友議小小齊公王縉妓也段成式有小小寫真  
寶應寺詩見續酉陽雜俎張紅紅韋青妓也召入宮號  
記曲娘見樂府雜錄轉轉鎮州書記韓定辭之所眷也  
王彧使至酒間盼之韓曰願垂一咏即以相贈彧援筆  
作賦文不停綴首云玳筵既啟雅樂斯陳霧捲羅帷花  
攢錦茵有西園之上客命南國之佳人貌逞嬋娟縱玉  
顏而傾國步移縹緲蹴羅襪以生塵遂載以歸見劉崇  
遠耳目記鄭舉舉善章程王蘇蘇王蓮蓮張住住見孫

蔡北里志楚楚宋杭州名妓也柳耆卿託其以所為詞  
見知州孫何見玉露李師師東京角妓也住金線巷色  
藝冠絕徽宗自政和後多微行乘小轎子往來師師家  
宣和六年冊師師為李明妃改金線巷為小御街金兵  
至李明妃廢為庶人流落湖湘為商人所得見宣和遺  
事吳女盈盈能詩與王山好見筆奩錄夷堅志愛愛  
姓楊氏錢唐倡家女為金陵少年張暹所調遂相攜潛  
遁後暹為父所捕愛愛以死守之念暹之勤遂死見蘇

子美愛愛集張英英徐州妓女也見菊林叢話毛惜惜  
高郵妓也榮全叛同衆飲宴惜惜不肯趨侍全責之惜  
惜曰妾雖賤妓不曾伏事反臣全斬之閭臣以聞封英  
烈夫人秋厓方岳作義娼傳見三朝野史及隨隱漫錄  
唐安安理宗癸丑元夕命董宋臣呼入禁中歌色絕倫  
見西湖志又趙真真于盼盼于心心李心心汪憐憐顧  
山山孫秀秀荆堅堅皆元妓之有名者見青樓集李當  
當名伎也忽有所悟為道士見輟耕錄

女子執國政者齊陸太姬司綸紘者唐上官婕妤司史  
事者漢曹大家主兵者唐平陽公主洗夫人為將軍者  
晉王廞起兵顧深母孔氏年百餘以為軍司馬廞復以  
己女為貞烈將軍唐行營節度許敬異以衛州侯氏滑  
州唐氏青州王氏赴義奏授果毅將軍契丹陳州女子  
號白頸鴉者有侍夫數十人封懷化將軍為女侍中者  
後魏元義妻胡氏齊高岳母山氏趙彥深母傅氏南漢  
盧瓊仙為女尚書者魏明帝選知書女子為之為女學

士者陳後主宮人袁大捨等唐德宗朝貝州宋氏五女  
若萃若昭若華若倫若憲為女博士者宋孝武朝韓蘭  
英

鐵圍山叢談云花蓋夫人蜀王建妾也後號小徐妃者  
大徐妃生王衍而小徐妃其女弟在王衍時二徐坐燕  
游污亂亡其國亦能賦咏及孟氏再有蜀傳至昶則又  
有一花蓋夫人作宮詞者是也謂花不足以擬之似花  
蓋之輕嫒也徐隨王衍歸唐半塗遭害花蓋夫人亦隨



昶歸宋從太祖游獵苑中為太宗射殺兩人者其生於蜀同其名同其能詩同其亡國而殺身同今人第知一花蕊夫人而不知其有二也按聞見雜錄太宗射殺者乃金城夫人非花蕊也

士人以氏族相高雖從古有之然未嘗著盛自魏氏銓綜人物以氏族相高亦未專任門地惟四夷則全以氏族為貴賤如天竺以刹利婆羅門二姓為貴種自餘皆為庶姓如毗舍首陀是也其下又有貧四姓如工巧純

施是也其他諸國亦如是國主大臣各有種姓苟非貴種國人莫肯歸之庶姓雖有勞能亦自甘居大姓之下自後魏據中原此俗遂盛行於中國故有八氏十姓三十六族九十二姓凡三世公者曰膏粱有令僕者曰華腴尚書令僕而上者為甲姓九卿方伯者為乙姓散騎常侍侍中大中大夫者為丙姓吏部正員郎為丁姓得入者謂之四姓其後遷易紛爭莫能堅定遂取前世仕籍定以博陵崔范陽盧隴西李滎陽鄭為甲族唐高宗

時又增太原王清河崔趙郡李通謂七姓然地勢相傾互相排詆各自著書盈編連簡殆數十家至於朝廷為之置官議定而流習所徇扇以成俗雖國勢不能排奪大率高下五等有百家皆謂之士族此外悉為庶姓婚宦皆不敢與百家齒隴西李氏乃皇族亦自列在第三其重族望如此一等之內又如崗頭盧澤底李土門崔靖恭楊之類自為鼎族其俗至唐末方漸衰息

今人以氏混於姓按氏正義曰猶家也釋例曰別而稱

之曰氏合而言之曰族曰姓氏者姓以繫統百世使不  
別氏以別子孫之所出言姓則在上言氏即在下如今  
云姓田氏姓聞氏族者屬也子孫共相連屬其旁支別  
屬各自為氏天子賜姓命氏諸侯命族故堯賜伯夷姓  
曰姜賜禹姓曰姁賜契姓曰子賜稷姓曰姬著在書此  
天子賜姓也諸侯賜卿大夫以氏若同姓公之子曰公  
子公子之子曰公孫公孫之子其親已遠不得上連於  
公故以王父字為氏若適夫人之子則以五十字伯仲

為氏若魯之仲孫季孫是也若庶子妻子則以二十字  
為氏展氏臧氏是也若異姓則以父祖官及所食之邑  
為氏以官為氏者則司馬司城是也以邑為氏者若韓  
趙魏是也凡賜氏族者比為卿乃賜有大功德者生賜  
以族若叔孫得臣是也雖公子之身若有大功德則以  
公子之字賜以為族若仲遂是也其無功德死後乃賜  
族若無駭是也若子孫各為卿其君不賜族子孫自以  
王父字為族也氏族對之為別散則通也故左傳云問

族於衆仲下云公命以字為展氏是也其姓與氏散亦得通故春秋有姜氏子氏姜子皆姓而云氏是也

氏又謂之姓故大傳言繫之以姓又言庶姓別於上則氏與姓一也氏又謂之族故羽父為無駭族隱公命以為展氏則氏族一也蓋別姓則為氏氏則有族族無不同氏氏有不同族故八元八凱出於高陽氏高辛氏而謂之十六族是氏有不同族也商氏徐氏之類謂之六族陶氏施氏之類謂之七族宋之摯氏謂之戴族向氏

謂之威族是族無不同氏也

氏有以國稱者若王侯虞夏之類是也有以邑稱者若卿大夫崔盧之類是也有以鄉以亭稱者封鄉以鄉氏若裴陸尸肥封亭以亭氏若麋采之類是也有以地稱者因所居氏之如陳舜之後居於媯因氏媯之類是也有以姓稱者得賜為姓若姜氏呂氏因佐禹治水有功賜姓之類是也有以字稱者若鄭駟乞以公子駟字為氏之類是也有以名稱者若魯展無駭以公子展為氏

之類是也有以次稱者若伯仲叔季如魯三家之類是  
也有以族稱者族即氏之別若長勺尾勺趙陽魯陽之  
類是也有以官稱者若太史太師司馬司空倉氏庫氏  
之類是也有以爵稱者若皇王公侯之類是也有以凶  
德稱者若英布被黥為黥楊玄感梟首為梟之類是也  
有以吉德稱者如趙衰人愛之如冬日其後有冬日氏  
之類是也有以技稱者若巫後為巫卜後為卜之類是  
也有以事稱者若車千秋以車為氏夏后緡逃出自竇



生少康以竇為氏之類是也有以謚稱者若莊氏出於楚莊僖氏出於魯僖之類是也有以爵系稱者若王言王則混矣本爵系而言有王叔王孫氏之類是也有以國系稱者若唐出於堯而唐孫氏又為堯之別族是也有以族系稱者若季友之後傳家則稱季孫不傳家則去孫稱季之類是也有以名氏稱者若士季有士氏又有士季氏之類是也有以國爵稱者若白氏舊國楚人取為邑以其後為白侯氏之類是也有以邑系稱者若

原以周邑得氏又加伯為原伯氏以別於原之類是也  
有以官名稱者若師延之後為師延氏之類是也有以  
官氏稱者若呂不韋為秦相子孫為呂相氏之類是也  
有以邑官稱者若魯沂邑因沂大夫相魯遂以沂相為  
氏之類是也有以邑謚稱者邑而加謚若苦成子之後  
為苦成氏之類是也有以謚氏稱者氏而加謚如鄭共  
叔之後為共叔氏之類是也有以爵謚稱者爵而加謚  
如衛成公之後為成公氏之類是也有以生之異稱者

若周平王少子生而有文在手曰武遂氏武又盤庚妃姜氏夢龍入懷孕十二月而生手把南字遂氏南之類是也

氏有同名而異實者如唐出自堯之後為唐周以封晉此晉之唐也本伊祁姓燮父之後封於唐為楚所并此楚之唐也本姬姓又如虞出姚姓之虞為舜後出姬姓之虞為仲雍之後是也又如王氏出自姬姓周靈王太子晉之後時人號曰王家故曰王氏太原王琅琊王其

後也出自畢公高之後魏信陵君子孫時人以其故王族號曰王家故為王氏又出北海陳留者則曰舜後其先齊諸田為秦所滅齊人號為王家此子姓之王也出河南為可類氏出馮衍為鉗耳族出莒州本高麗出安東本阿布思此虜姓之王也又如裴氏出風姓非子之支孫封非鄉邑故為非邑氏至後世去邑從衣為裴此一裴也晉平公封顓帝之孫於裴中號裴君此又一裴也又如余顧世本顧國夏商諸侯也以國為氏又句踐

之後別封顧余以邑為氏上已姓下姒姓不同原也

改氏之原古有以賜而改者如婁項為劉酈為食其李為獨孤徐為李是也氏有以嫌而改者如赫連氏以本宗支庶非正統並為鐵伐氏謝服以出征嫌其姓不祥改為射氏是也氏有以罪而改者如馬以何羅改為莽蕭以巴東王子響叛齊武帝改為蛸唐改武惟良為蝮貶劉誕為留是也氏有以避諱而改者如宋以武公名司空改為司功氏晉以僖侯名司徒改為司城氏籍避

項羽諱改為席奭避漢元帝諱改為盛莊避漢明帝諱  
改為嚴弘避唐明皇諱改為洪是也氏有以音訛而改  
者如陳為田韓為何革為辛姁為似呂為甫歐為區雷  
為盧是也氏有以省文而改者如鄣為章郛為丙郤為  
召郤為禹是也氏有以省言而改者如盧蒲為盧閭丘  
為閭即墨為即鍾離為鍾馬服為馬司寇為寇是也氏  
有以避仇而改者如端木之後為木又為沐墨台之後  
為墨又為怡伍之為五譚之為覃刀之為刃牛之為牢

疏之為太傅章之為仇是也氏有變夷者賀魯為周賀  
葛為葛阿史那為史宿六斤為宿是也氏又有變於夷  
者如後周宇文改辛為普屯王為可頻由為紇干李為  
徒何之類是也

梁時朝士有姓吉者謁尚書令何敬容卒問曰君於丙  
吉幾世矣答曰如明公之於蕭何一時傳以為笑愚以  
為未可非也韓退之作諱辨以騏期杜度嫌名為辨愚  
以為不必辨也如夏啟之後曰啟帝沃丁之後曰沃黃

帝相力牧之後曰牧相倉頡之後曰頡令倫之後曰倫  
八元伯奮之後曰奮仲堪之後曰堪叔豹之後曰豹顓  
帝子老童之後曰童八凱隕散之後曰散叔達之後曰  
達大臨之後曰臨虞相龍之後曰龍殷相巫咸之後曰  
咸傅說之後曰說周內史服之後曰服后稷孫鞠之後  
曰鞠周大夫史篇之後曰篇卿士樊皮之後曰皮王子  
朝之後曰朝王子狐之後曰狐大夫封昔之後曰昔魯  
公子展之後曰展公孫茲之後曰茲季孫夙之後曰夙



端木賜之後曰賜費宰南遺之後曰遺大夫仲述之後  
曰述孔門琴牢之後曰牢晉大夫卻犇之後曰犇虢射  
之後曰射傅槐之後曰槐先且居之後曰居畢萬之後  
曰萬狼暉之後曰暉師曠之後曰曠匠麗之後曰麗鄭  
穆公蘭之後曰蘭公孫印段之後曰段公子豐之後曰  
豐公子然之後曰然衛出公輒之後曰輒公子郢之後  
曰郢齊太公望之後曰望太史激之後曰激公子駱之  
後曰駱大夫童刁之後曰刁楚子鬻熊之後曰熊太子

建之後曰建大夫封渦之後曰渦叔山冉之後曰冉屈  
到之後曰到鬻拳之後曰拳宜僚之後曰僚宋微仲衍  
之後曰衍公子樂父之後曰樂大夫猛獲之後曰獲華  
耦之後曰耦吳相伍員之後曰員趙相虞卿之後曰卿  
以至倉頡勾龍陸終飛廉季隨季騶意如夷吾慶忌將  
具嬰齊棄疾目夷庶其祝其偃師之類直取其名為氏  
此皆三代之人將何所諱耶然則敬容殊不難答但初  
問為可笑耳

左氏之春秋傳太史公之史記其載諸國姓氏與夫世次皆有可疑者春秋時諸侯之國凡一百十五可以知其姓與爵者四十有六晉楚之類是也可以知其姓而不可以知其爵者一十有八焦陽之類是也可以知其爵而不可以知其姓者一十有七沈之類是也其爵其姓皆不可得而知者三十有三鮮虞陸渾之類是也然知其姓者亦不可究信如以趙為羊姓而子長又以為姬姓以祁姓鄩國為重黎之後又以為吳國之後至姜

氏為伯夷之後又以為四嶽之後是其言亦自相異同  
矣史記始於黃帝迄於漢武天子世次見於帝紀諸侯  
世次見於世家夏後為杞商後為宋以其世家本紀併  
考之則其苗裔歷歷皆可考至於滕薛邾郕之屬雖其  
事見於春秋而其世次之不傳者又不可盡信堯乃舜  
之從高祖而舜乃妻其女鯀乃舜五世從叔父與舜同  
為堯臣湯與王季同世也湯下傳十六世而為紂王季  
傳一世而為文王二世而為武王則是文王以十五世

祖而臣事十五世孫紂武王以十四世祖而伐十四世孫紂而代之必不然矣此子長之論世裔所以為可疑也

姓氏之說最盛於唐而國姓無定論林寶作元和姓纂而自姓不知所由來漢有鄧氏官譜應劭有氏族篇又有潁川太守聊氏萬姓譜魏立九品置中正州大中正主簿郡中正功曹各有簿狀以備選舉晉宋齊梁因之故晉散騎常侍賈弼太保王弘齊衛將軍王儉梁北中

郎詔議參軍知撰譜事王僧孺之徒各有百官譜徐官  
又有百家譜宋何承天撰姓苑與後魏河南官氏志此  
二書尤為姓氏家所宗唐太宗命諸儒撰氏族志一百  
卷柳沖撰大唐姓系錄二百卷釋曇剛有山東士大夫  
類列三卷路淳有衣冠譜韋述有開元譜柳芳有永泰  
譜柳璨有韻略張九齡有韻譜林寶有姓纂邵思有姓  
解其書雖多皆本世本公子譜二書二書皆本左傳然  
左氏所明者因生賜姓胙土命氏及以字以謚以官以

邑五者而已

漢功臣表多奇姓與名之不避惡疾者如廣嚴侯召歐  
成敬侯董漂陽夏侯陳絺隆慮侯周竈武彊侯莊不臧  
貫齊侯合傳胡害海陽侯搖母餘曲成侯蟲達芒侯彤  
跖祁侯縉賀高宛侯丙猜辟陽侯審食其高胡侯陳天  
乞厭次侯爰類陽河侯其石摎頃侯溫疥深澤侯趙將  
夕宋子侯許癭昌圉侯旅卿共嚴侯旅能師闕氏侯馮  
解散戴敬侯祕彭祖平州共侯昭涉掉尾下相侯冷耳

高梁侯酈濟黎項侯召奴從票侯趙破奴龍侯摎廣德  
語兒侯棟終古樓虛侯訾順蒙鄉侯遂晉

楊萬里談晉于寶一吏取禮部韻書下注有于寶以進  
曰乃于寶非于也楊大喜以為一字師然宋板晉書文  
選俱作于寶于令升及搜神記周禮注亦俱作于無有  
稱于者胡承之以為字畫相沿之訛而取于子書為證  
按春秋有于犂後漢有于吉寶豈其後耶然亦自有于  
定國安知寶之不為其後也陸法言廣韻止引于犂而



不及實則部韻亦未知所據也

說畧卷九